



Kamis, 25 Agustus 2022
Ogen: Heber 4:9-11



"Wari Pengadi-ngadin"



Kai kin erti ras tujunna kita nggeluh i bas kiniteken? Penungkunen enda mabai kita lako bengket ku bas paksa tenengta wari enda alu tema "wari pengadi-ngadin." Arah erkiniteken me erbahanca manusia banci ngidah sura-sura Dibata, erkiniteken mpengasup manusia nadingken sura-sura kedagingenna bage pe arah erkiniteken ka me dalanna manusia banci seh ku pengadi-ngadin Dibata.

I bas Heber 4:9-11 ituliskan maka lit denga nge wari pengadi-ngadin guna anak-anak Dibata, kalak si bengket ku pengadi-ngadin Dibata tentu ngadi ia i bas dahinna nari, bagi Dibata ngadi i bas wari si pepituken e. E maka perlu kita erpala-pala gelahna kita bengket ku bas pengadi-ngadin Dibata. Kalak si banci bengket ku pengadi-ngadin Dibata e me kalak si patuh ndalanken undang-undang Dibata dengen ndalankenca suari ras berngi i tengah-tengah geluhna. Kepatuhen nandangi undang-undang Dibata e perlu ilakoken, sabap e me dalanna kita seh ku pengadi-ngadin Dibata. Tuhu enterem jelma mesera akapna patuh kempak undang-undang Dibata e sabap megati la terlawan sura-sura doni. Tapi perlu inget maka adi la patuh la banci bengket ku pengadi-ngadin Dibata. Ibaratken bagi sekalak si maba kenderaan, di kune la ia matuhi rambu-rambu si lit tentu banci erbahanca dirina cilaka dengen kalak sideban banci ikut cilaka. Melala ruginna adi la kita patuh nandangi rambu-rambu lalu-lintas bage pe dikune kita ngelanggar undang-undang.

Kepatuhen e buah kinitekennta man Dibata, Tek kita maka IA me ulu kegeluhen ras keselamatenta. Ia ngenca si nagsup mereken keterkelinnen e man banta. Kepatuhen e I bas erti kiniteruken ukurta maka labo kita ngasup erdalan si sada. Adi la ras Tuhan labo lit dalam keselamatan e. Tetap lah ras Tuhan seh ku wari pengadi-ngadin.